



KomunikaduImprensa
Distritu Manatuto
5 Dezembru 2016

Lideransa estrutura eleitu Suku Ma'abat kompromete redus violénsia doméstika iha sira nia-suku no manifesta interese ba kontinua kolabora ho JSMP iha futuru

Komunidade Suku Ma'abat, Postu Administrativu Manatuto Vila, Munisípiu Manatuto hamutuk ho estrutura foun Suku Ma'abat kompromete atu redus ka hamenus violénsia kontra fetu (violénsia doméstika) iha sira nia comunidade rasik. Komprimisu ne'e hato'o durante sesaun treinamentu ne'ebé hala'o iha 1 Dezembru 2016.

Partisipante ne'ebé mak partisipa iha treinamentu ne'e hamutuk ema nain 30 kompostu husi comunidade fetu 15 no comunidade mane 15. Partisipante sira mai husi Aldeia Soraha no Ma'abat Lor. Treinamentu ne'e ho objetivu atu hasa'e kuñesimentu comunidade sira nian no enkoraja sira atu asesu ba sistema justisa formal.

“Komitmentu ne'e manifesta sinál pozitivu no pasu importante iha suku laran no lori esperansa foun ba comunidade fetu sira atu ses an hosi pratika violénsia ne'ebé nia abut metin iha familia no sociedade. Espera katak vontade ne'e la-sai hanesan komprimisiu deit maibe tenke konkritiza iha planu asaun suku nian liuhosi asegura implementasuan Lei Kontra Violénsia Doméstika atu comunidade sira mós integradu ho planu suku nia kona-ba komprimisiu hirak ne'e,” dehan Luis de Oliveira Sampaio, Diretór Ezekutivu JSMP.

Iha treinamentu ne'e aliende introdus kona-ba Lei Kontra Violénsia Doméstika no provizaun relevante sira kona-ba krime violénsia bazeia jenéru nomós kobre asuntu relevante sira relasiona ho knaar Juis, Ministériu Públiku, Defensória Públiku, Advogadu Privadu no Polísia. Aleindé ne'e inklui oinsa atu asesu no halo kontaktu ba organizasaun fetu sira ne'ebé fo assisténsia hodi asesu ba justisa formal.

Iha treinamentu ne'e partisipante sira apresenta problema ne'ebé sira infrenta mak hanesan violénsia doméstika no abuzu seksuál ba menór, ne'ebé mak dala barak akontese ba iha labarik Pre-Sekundaria sira. Maibe tanba comunidade sira ladun iha informasaun adekuaду kona-ba krime sira tuir lei aplikavel, nune'e ladun fó atensaun ba kestaun sira kona-ba krime hasoru fetu

no labarik. Komunidade sira mós apresenta sira nia preukupasaun no kestiona kona-ba kazu balun ne'ebé autóridade sira uza póder hodi intervene.

Partisipantes no estrutura suku foun sira konsidera katak mekanismu sira divulgasaun lei hanesan ne'e importante teb-tebes atu kontinua iha futuru. Komunidade sira iha area rural iha difikulidade estruturál atu asesu ba dezenvolvimentu importante sira inklui lei foun sira relasiona protesaun ba feto no labarik. Bazeia ba konsiderasaun hirak ne'e partisipantes sira husu ba JSMP atu kontinua atividade hanesan ne'e iha futuru, liuliu tanba atualmente iha mudansa iha autoridade komunitáriu foun sira ne'ebé foin eleitu persiza aktualiza sira nia an enkuadramentu legal aplikavel sira. Sira konsidera katak informasaun legal sira ne'ebé JSMP lori ba sira nia suku no aldeia nu'udar esperénsia úniku no foun ba iha sira nia comunidade.

Administrador Postu Administrativu Manatuto Vila, Sr. Gaspar Henriques da Silva, iha sesaun abertura husu ba partisipante sira liu-liu strutura foun suku Ma'abat nian hodi bele partisipa ho másimu nune'e bele aprende lisaun ruma ne'ebé serve hanesan matadalan no aprende husi esperiensia hodi bele hadia fallansu sira ne'ebé mak durante ne'e ita hanoin ladun loos tuir Lei.

Aktividade ne'e realiza ho apoiu finanseiru husi Embaixada Canada iha Jakarta Indonezia.

Atu hetan informasaun kle'an favor kontaktu:

Luis de Oliveira Sampaio
Diretór Ezekutivu JSMP
Email : luis@jsmp.minihub.org